

Karl danter tradizion, cultura y adrenalina

D'ansciuda dl 2006 ova Karl Unterkircher metù adum na pitla grupa de arpizadëures per jì tl Tibet, plu avisa dl raion dl Sichuan, per na spedizion sun l crëp sant "Genyen". Sèn iel unì prejentà l film de chësta spedizion, da garat sun DVD

Alpinism - Dan n valguna enes à Karl Unterkircher prejentà tl Four Points Sheraton Hotel de Bulsan si prima DVD "L sucrèt de Genyen". Pra la spedizion de dan doi ani da udèi tl film se tratòvela de ruvé te na valeda puech cunesciuda y de fé na arpizada per l parèi nord, che degun alpinista ne ova mo mei arzicà.

I cumpanies de Unterkircher, Armin Widmann reghisser dl film, Hans Peter Karbon aiut regista, i arpizadëures Walter Nones, Gerold Moroder y Simon Kehrer y l dutor Leonardo Pagani fova te si team. La spedizion al crëp sant "Genyen" ova butà dut ntëur dassenn y nsci se à Armin Widmann purv à mèter adum n bel film cun na mujiga drèt particulera, na cumposizion de Hansjörg Mutschlechner aposta per chësc film.

La persones y si cultures

"Tl film," nsci Karl Unterkircher, „ti éi dantal dut dat mpurtanza ala



L cuiertl dl dvd.

natura, ala carateristica dla persones cun si cultures y tradizions y al cunliamënt dla religion cun l crëp sant. L ie n film che lascia udèi luesc, che ne n'ie nchinamò mei unii prejentei te nosc raions". Cun plajèi àn pudù saludé ala prejentazion l assessëur Florian Mussner, i ambolc de Sëlva y Urtijèi Roland Demetz y Ewald Moroder, l diretëur dl Cunsorz de Turism, trüep jurnalisc y n valgun media dla televizion. Tl menù dla DVD

pössen crì ora l film te cater rujenedes, ladin, talian, tudësch y nglëisc, na lingia de 200 fotografies dl Tibet y 2 spot publiziteres, un de Südtirol y un de Gherdëina. Acioche la DVD garatësse tan a puntin à judà pea tla pert ladina mo d'otra persones, coche Rut Bernardi, Leo Senoner y Paul Demetz. Nia desmincè ne dàussen Susanna Scott, marideda Planker dla Cësa Rodella te Sëlva, per la pert nglëija. Per l finanziaimënt y i cuntribuc ti vāl n gra de cuer al assessorat per la Scola y Cultura Ladina de Bulsan, ala Cassa Raiffeisen de Sëlva y ala Cunsorz de Turism de Gherdëina. La DVD, che à na cuverta che passenea avisa al titul dl film, giàpen da cumpré te plu butëighes de Gherdëina, pra duta la filieles dl'Athesia y sambënzënza nce online tres la plata internet de Karl Unterkircher <http://www.karlunterkircher.com/>

Lecurdan Stefano Zavka

N cunvëni mpurtant iel stat a Terni ai 14 de merz, metù a jì dal'Assoziazion Stefano Zavka. Tlo à nce Karl Unterkircher ulù ti dé n cuntribut de solidarietà. L se trata dla prima manifestazion metuda a jì dal'oma, nce presidënta dl'assoziazion, per lecurdé si mut Stefano Zavka, mort sun l K2 d'instà dl 2007. Stefano Zavka

fova jit pea n tòch cun Karl pra la spedizion sun l K2 tl 2004. Pra chësc cunvëni, ulache l à fat pea plu alpinisc, àn rujenà dla respunsabltà y dl'etica coche regules dl alpinism y n cuncret nce dla desgrazia sun l K2.

Cungres nternaziunel a Roma

A Roma iel stat danter i 28 y i 30 de merz n cungres dal titul



N ucajian dla prejentazion a Bulsan.

"Sport incredibile" tl Ciastel Gandolfo. L se à tratà de na ancunteda nternaziunela danter 37 nazions, che ova coche tematica "la credibltà y la belëza dl sport per judé pea a fé su n mond che tèn adum tl sport y tres l sport." Tlo à Karl Unterkircher, ghest d'ezelënza per l'ucajian, dat n cuntribut cun la proiezion y la spiegazions n con' dl'ultima spedizion sun l Gasherbrum II. L cungres vën metù a jì, urmei da

plu ani incà, da "Sport meet – for a united world", cun a cë l presidënt Paolo Crepaz, giornalista y dutor dl sport.

L Gasherbrum de juni y lugio.

L Hidden Peak, nce cunesciù coche Gasherbrum I o K5, ie la piza plu mpurtanta dla ciadëina dl Gasherbrum, auta 8.068 metri. L inuem vën dala rujeneda Balti y ie



Na bela udera sun l Gasherbrum I y l Gasherbrum II.



Karl Unterkircher cun i patri dl raion dl Sichuan, n ucajian dla spedizion sun l crëp sant "Genyen".



L Gasherbrum I o K5, che uel di „Bel crëp“.

metù adum da "rgasha" (bel) y "brum" (crëp), che uel nscila di bel crëp. La "K" sta per Karakorum. Chësc crëp ie n jin dl Gasherbrum II, che Karl ova arjont cun suzes, deberieda cun si cumpanies Daniele Bernasconi y Michele Compagnoni, l instà passà, plu avisa ai 20 de lugio dl 2007. Te na ntervista al ALP Magazine dij Karl: „D'instà dl 2007, canche son jic a giauri la via nueva sun l Gasherbrum II, se ons studià ju l parèi a puntin. Son stai boni de abiné na via che deguni ne à mo fat, nce sce l ie bele trëi iedesc che l ie unì purv.“ L jirà inò pea Daniele y Michele, che ie stai de gran mpurtanza per l suzes dl ann passà. Chëst ann va nce pea Walter Nones, che ie bele jit cun èl a fé l K2 tl 2004 y l Genyen tl 2006. Plu avisa repurterons de chësta spedizion plu inant, te n'otra ucajian, pra la comunicazion ufiziela dl proiet.

Karl Unterkircher, n star restà oml

Tlo mo n doi minonghes persuneles. Karl Unterkircher ne toca nia pra la sort de alpinisc che sveia ora sëura dut l mond si resultat, y che uel vester prijà y recunesciù dai media y dala jënt per si mpënies y suzesc. Purmpò àl, do mi minonga, arjont l zenit per fé pea cun rejon pra la cumpèida di miëur alpinisc estrems. N inuem che à scrit storia tl ciamp dl alpinism, per ejëmpl cun si Record Guinness 2008, cun vies nueves sun parëies mo mei fac, y che scrijerà bonamënter nce ti ani da unì for inò da neuf capituli de storia dl alpinism. Unterkircher ie cunesciù urmei mpue' sëura dut l mond. Y mpo iel restà na persona omla, cun l cë sun la sciabla, cun i piesc sun fonz. L ie da ti auzé l ciapel per si potencial de jì a crëp. "Karl ie un di nosc, un de Gherdëina," nsci l assessëur Florian Mussner, "de na valeda nvieda via tl turism propi tres i prim seniëures unic adalerch, che fova propi arpizadëures."

Na gran fortuna per duta la valeda.

Herbert Mussner



Karl Unterkircher.